

Songkok gaya Tun tarik perhatian

■ ALOR SETAR 26 MEI

GERAI menjual songkok yang dimiliki Sardi Dahar di tingkat bawah Kompleks Pekan Rabu, di sini kembali mendapat perhatian orang ramai yang ingin mendapatkan 'songkok gaya Tun' untuk dipakai ketika sambutan Aidilfitri nanti.

Selain tertera nama Perdana Menteri, Tun Dr. Mahathir Mohamad, songkok gaya Tun mempunyai ciri-ciri tersendiri antaranya ringan, boleh dilipat, tidak kecut serta dibuat daripada baldu berkualiti sekali gus menjadikannya pilihan utama pelanggan yang berkunjung ke gerai itu.

Sardi, 61, berkata bagi musim perayaan sebanyak 200 hingga 250 buah songkok itu akan dijual kepada pelanggannya berbanding 150 pada hari biasa.

"Walaupun dijual pada harga RM25 hingga RM120 sebuah, tetap mendapat sambutan bagi pengguna yang menitikberatkan kualiti.

"Songkok gaya Tun ini juga



DR. MAHATHIR MOHAMAD memilih songkok di Kedai Sardi Dahar (dua dari) ketika melawat Kompleks Pekan Rabu di Alor Setar, Kedah semalam. - BERNAMA

telah ditambahbaik dengan meletakkan tanda dagangan 'Style Tun Collection' dan 'Prime Minister of Malaysia' di sisi kiri dan kanan di bahagian dalam songkok, malah pengguna juga boleh menempa nama sendiri pada songkok tersebut pada

harga RM150 satu," katanya kepada *Bernama* di sini.

Sardi berkata, sejak diberikan kebenaran oleh Dr. Mahathir untuk membawa namanya pada songkok itu pada 2002, kualiti pembuatan songkok itu sentiasa ditambah baik bagi memberi

kepuasan kepada pelanggan.

"Tun (Dr. Mahathir) minta saya jaga kualiti sebab bawa namanya... sebab itu proses pembuatan songkok ini memakan masa demi menjaga kualitinya seperti diminta," katanya.

Mencerita lanjut mengenai kualiti songkok itu, Sardi yang mula berkecimpung dalam bidang pembuatan songkok sejak berusia 18 tahun berkata, songkok gaya Tun dihasilkan dengan baldu terbaik selain jahitan tangan yang kemas serta mempunyai corak dalaman yang berbeza berbanding songkok lain yang ada di pasaran.

"Saya pernah ditegur seorang pelanggan agar memberi kelainan sehinggalah beberapa kali percubaan akhirnya tampil dengan reka bentuk yang menawan hati Tun Dr. Mahathir sehinggakan Perdana Menteri menjadi pelanggan tetap di gerai ini," katanya yang mewarisi kemahiran membuat songkok daripada arwah bapanya yang berasal dari Sumatera Barat, Indonesia.

Sardi berkata, memandangkan sambutan yang menggalakan terhadap songkok itu, beliau bercadang untuk memperluaskan pasaran songkok itu ke seluruh negeri ini mulai tahun depan dengan kerjasama sebuah syarikat swasta dari Kuala Lumpur. - BERNAMA